



BARANGAY ELEKSYON O REBOLUSYON?

Taliabot na usab ang barangay eleksyon karong Mayo. Usa na usab kini ka pasundayag sa rehimeng US-Ramos aron ipanghambog nga adunay demokrasya ang Pilipinas ug buhibuhian ang mga demokratikong proseso sama sa eleksyon. Pero sa tinuoray, ang ilang giingon nga demokrasya dili tinuod kay wala kini magtuboy sa gahum ug interes sa lapad nga katawhan. Sa kamatuoran, ang matang sa demokrasya nga giyinawyaw sa rehimeng US-Ramos mao ang demokrasya sa nagharing hut-ong --- demokrasya alang sa walay pugong ug mpadayonon nga paghari, pagpahimulos ug pagpanglupig sa katawhang Pilipino.

Ang mga eleksyon nahimo nang usa ka establisadong demokratikong paagi sa pagpili sa mga mangatungdanan sa gobyerno. Apan sa usa ka gobyerno nga gidominaran sa mga reaksyonaryong hut-ong sama sa rehimeng US-Ramos, kanunay lang nga mini ang unsa mang mga eleksyon tungod kay nahisulod kini sa balayan sa reaksyonaryo nga eleksyon. Sa esensya, ang reaksyonaryong eleksyon usa ka mahugaw nga dula sa mga reaksyonaryong politiko ug pampulitikang partido nga nagrerepresentar sa mga paksyon o barkadahan sa haghaharing hut-ong nga nag-inilogay sa gahum.

Wala mahinulag niini an barangay eleksyon. Katuyuanan sa rehimeng US-Ramos nga makonsolida ang iya makinarya sa bataan nga ang-ang ug magamit ini alang sa iyang interes. Gamiton ni Hen. Ramos ang barangay eleksyon aron maduso ang iyang diktaduryal ug militaristang mga plano. Kadugtong niini nga laraw ang plano nga maamyendahan ang konstitusyon sa Pilipinas aron mapalusot ang mga pasista ug antinasyunal nga mga balaod ug padugayon ang paghupot niya ug sa iyang mga tawohan sa poder, lapas sa 1998.

Ang uban man usab nga paksyon sa naghaharing hut-ong nga mingbatok kang Hen. Ramos naninguha usab nga magamit ang barangay eleksyon aron makapahimutang ug tawo, makalapad sa impluwensya ug kontrol sa bataan nga ang-ang. Gamiton kini nila nga pangpolitikang sukaranan alang sa taliabot nga nasudnong eleksyon sa 1998 sa pagmani-obra nga sila na man usab ang makahupot o kun dili man makaambit sa pangpolitikang gahum sa reaksyunaryong gubyerno.

Gamiton sa rehimeng US-Ramos ang barangay eleksyon aron bungkagon ang rebolusyonaryong pagkahiusa sa katawhan. Gihimo kini nila pinaagi sa pagsabong sa mga tawo, sinulsulay, dautay ug ilogay sa mga botos nga nahimong hinungdan sa mga away tali sa matag indibidwal, pamilya ug bisan sa han-ay sa mga organisasyong masa. Gisakyan nila ang grabe nga kalisdanan sa masa aron gamiton ang gahum sa kwarta, benepisyo, ug bakak nga mga saad, gahum, koneksyon ug uban pa aron bungkagon ang nakab-ot na nga ang-ang sa rebolusyonaryong pagkahiusa sa masa ilabina diha sa atong mga sona ug baseng gerilya.

Samtang nagkalisod lang ang kahimtang sa katawhan tungod sa krisis ug kawalay nahimong paglambo, gigamit ang barangay eleksyon aron ilaron ang tawo, maghatag og mini nga paglaum, ug mahikalimot sa bataan nga mga problema ug solusyon niini ug makabig ngadto sa repormismo.

Unsaon man pag-atubang sa rebolusyonaryong katawhan ang taliabot nga barangay eleksyon? Kinahanglan magkahiusa ang tibuok rebolusyonaryong pwersa ug katawhan sa pagbutyag sa reaksyunaryong kinaiya ug katuyuanan sa umaabot nga barangay eleksyon pinaagi sa usa ka kampanya sa propaganda ug edukasyon. Ipakita nato dinhi nga wala diha sa mga reaksyunaryo nga eleksyon ang kaugmaon sa pinahimuslan ug dinaugdaug nga katawhan. Magkaaduna lay tinuod nga demokratikong eleksyon ug tinuod nga gubyernong gipanguluhan sa masa sa taknang mokusog ug molig-on ang rebolusyonaryong kusog sa katawhan. Hingpit

kining makab-ot sa pagkalumpag sa dunot nga sistema ug sa pagkatukod sa demokratikong gubyerno sa katawhan. Rebolusyon ug dili eleksyon ang solusyon sa mga batakang problema sa katawhan. Kinahanglan mapasagop sa lapad nga katawhan, gikan sa ilang kaugalingong mga kasinatian, ang mga batakang problema sa imperyalismo, pyudalismo ug burukrata kapitalismo ug ang rebolusyonaryong *mga solusyon niini.

Kinahanglan batokan ang kontra-rebolusyonaryong mga atake sa kaaway kasumpay sa eleksyon. Magtinabangay kita sa pagpugong o sa pagpakyas sa laraw sa nga reaksyunaryo nga gamiton ang eleksyon aron bungkagon ang rebolusyonaryong pagkahiusa sa katawhan ug

rebolsuonaryong kalihokan. Batokan nato ang gihimo nilang pagsabong-sabong sa katawhan, paluyahon ang pagkahiusa ug bungkagon ang mga organisasyon masa ug kabigon kini sa repormismo. Sa atong buluhaton politika, kinahanglan ibutyag ug batokan kining mga nakatago nga mga katuyuanan, pukawon an masa sa tukmang rebolusyonaryong paglihok ug ikonsentra ang kusganon nga pakig-away sa mga prinsipal nga nanulsol sa pag-amyenda sa konstitusyon ug sa pagpapadayon sa pagpangatungdanan ni Ramos ug sa iyang mga piniling opisyaes lapas sa 1998; sa prinsipal nga nanulsol sa repormismo, pagbahin-bahin sa masa ug sa mga kontra-rebolusyonaryo.

Katuyuan sa rehimeng US-Ramos nga makabutang og mga tawo o opisyaes sa mga baryo nga epektibong mosunod sa iyang mga katuyuanan nga dumalaon ang katilingban sa usa ka diktaduryal ug militarista nga paagi. Pakyason nato kini pinaagi sa pagtuboy sa mga progresibo ug masaligang mga elemento nga mokandidato sa eleksyon ug mabutang sa mga konseho. Kun mahimo nato kini, mapalihok nato ang mga konseho sa baryo dili alang sa katuyoanan sa rehimeng US-Ramos kun dili alang sa kaayohan sa masa sa baryo ug sa rebolusyonaryong kalihokan. Kun ang tinuod nga representante sa mga baryohanon ang anaa sa konseho sa mga barangay, mas mahatagan og lapad-lapad nga lugar ang paglihok sa masa ug rebolusyonaryo nga pwersa. Depende sa ang-ang sa rebolusyonaryo nga impluwensiya, pwede mahimong aktibo nga makinarya sa legal nga pakigbisog sa masa ang mga konseho sa barangay. Mahimo usab nga mamaksimisa ang ilang pagtabang pinasikad sa naabot nga kusog sa kalihokang masa ug rebolusyon.

Kun lutaw ang mga kontra-rebolusyonaryo o kontra-katawhan o lutaw nga itoy-itoy sa rehimeng US-Ramos nga anaa mingdagan sa eleksyon, pwedeng aktibong motubay sa eleksyon ang masa depende sa naabot nga ang-ang sa kakayahan sa masa sa lugar. Sa mga lugar nga luya pa kita, ayaw kita pagkab-ot nga makalunsad og aktibong pagtubay sa eleksyon kay asegurado lang kitang mapakyas. Ang importante mao nga padayon ug pursigido natong gipasulong ang atong politikal nga mga buluhaton nga nagpasulong sa rebolusyonaryong kalihokan sa pulido ug pangdugayay nga pamaagi. Total kun mokusog na ang rebolusyonaryong kalihokang masa sa lugar, mahimo man niining manyutralisa o makabig ang si kinsa mang anaa sa konseho sa baryo aron mapuslan sa masa ug rebolusyon. Ang atong pagtubay sa eleksyon, himuon nato sa usa ka pamaagi nga dili makasupak sa atong katuyoang makapalapad sa rebolusyonaryong

impluwensiya, makapakusog sa organisasyong masa ug makapalig-on sa rebolusyonaryong pagkahiusa sa masa. Sa pagpili sa mga kandidato, pinakamaayo kun ang mapili nga naproybaran na nga matinud-anon sa masa ug rebolusyon, lig-on nga mibarug sa interes sa baryohanon, maayong makighiusa sa masa, dili sunod-sunuran sa ilang mga labaw nga nagdaut sa interes sa masa ug dili korap.

Konsolidahon nato ang rebolusyonaryong pagkahiusa sa katawhan sa panahon sa barangay eleksyon. Kinahanglan manguna sa pagmentinar sa rebolusyonaryong pagkahiusa sa mga baryohanon ang mga nangunang mga organisasyong masa sa kabaryuhan ug ang ilang mga lider. Aron maseguro ang rebolusyonaryong pagkahiusa, kinahanglan magkaadunay tukmang paghupot sa nagbangaay nga parehong rebolusyonaryong pwersa o alyado sa usa ka pamaagi nga sa pagkahuman sa eleksyon makab-ot lang gihapon nato ang rebolusyonaryong pagkahiusa. Panguhaon natong malikyan ang wala na kinahanglan pagkabahin sa masa. Dili malikyan ang mga bangaay sa magkatugbang nga mga Partido o politiko, pero mahimo nato kining mapamenosan pinaagi sa atong maayong buluhaton pangpolitika. Kinhanaglan mapugngan ang mga elemento ilabi na ang mga politiko o tawohan niya nga magsabwag og intriga, pagkabahin o wala kinahanglanang bangaay sa han-ay sa masa. Pagkahuman sa eleksyon, kinahanglan himuon ang haum nga mga lakang aron daling mapahiulian ang mga nangagum-os nga mga relasyon sa han-ay sa masa ug alyado tungod sa eleksyon.

Sa katapusan, ipursigi nato ang kalihokang pagtul-id samtang giatubang ang isyu sa barangay eleksyon. Nanguna pa natong buluhaton ang pagpasulong sa kalihokang pagtul-id. Busa angay ug padayong ipatuman ang mga natak dang mga buluhaton sa kampanya sa kalihokang pagtul-id. Apan kinahanglan usab natong atubangon og maayo ang isyu sa barangay eleksyon isip tipik sa atong taktikal nga pagpangulo. Sa proseso sa paghupot nato sa mga buluhaton kasumpay sa eleksyon, nagtul-id usab kita sa mga naglabay nga pagkasayop nato kabahin sa eleksyon.★

REBOLUSYON DILI ELEKSYON !

IBAGSAK ANG US-RAMOS NGA REHIMEN !

**ISULONG ANG NASUDNON DEMOKRATIKONG REBOLUSYON
NGA MAY SOSYALISTA NGA PERSPEKTIBA !**